



## The Holy See

---

IOANNES PAULUS PP. II LITTERAE APOSTOLICAE *EGO VENI* VENERABILIBUS DEI SERVIS DIDACO VENTAJA  
MILÁN, EMMANUEL OLMO

ET VII SOCIIS MARTYRIBUS, BEATORUM HONORES DECERNUNTUR Ad perpetuam rei memoriam. – «Ego veni, ut vitam habeant et abundantius habeant (*Io* 10, 10). Per mortem et resurrectionem suam Dominus Iesus mundum redemit atque ipsius verbum suscipientibus et adimplentibus vitam aeternam est pollicitus. Idem Dominus docuit tam pretiosum donum esse vitam aeternam, ut cuivis terrestri bono sit anteponendum et vel supremo sacrificio tuendum: «Nolite timere eos qui occidunt corpus, animam autem non possunt occidere» (*Mt* 10, 28). Evangelii praeceptis imbuti ac Spiritus Sancti robore sustentati, bello intestino in Hispania saeviente, non pauci Christiani sanguinem suum fuderunt, ne a Christi dilectione desciscerent atque ut vitae aeternae praemium consequerentur. Inter illos Christi strenuos testes duo Episcopi annumerantur et septem Fratres Scholarum Christianarum. Deo penitus inserviebant ii et proximo, veritatem pacemque amabant, omnino a politicis studiis alieni, quibus Hispania subvertebatur. Nihilo minus odio fuerunt et persecutioni obnoxii. Quod autem divini Magistri fuerunt discipuli, Ecclesiae membra et fideles regni Dei famuli, hoc satis habuerunt ut ipsi inter mundi inimicos annumerarentur et morte digni ducerentur. At ipsi, de periculis in se imminentibus quanquam conscii erant, simpliciter humiliterque fidem testari perrexerunt atque cum se abdere vel fugere possent, manere in suo loco maluerunt, ut suam explicarent missionem et caritate apostolatuque proximum iuvarent. li fuerunt: Didacus Ventaja Milán, Episcopus Almeriensis. Die XXII mensis Lunii anno MDCCCLXXX natus, post ordinationem sacerdotalem canonici et doctoris in Sacro Monte Granadae functus est munere. Annum tantummodo fuit bonus industriusque pastor Almeriensis dioecesis, cum Christi inimici eum sunt persecuti. Vitam servare potuerat, at gregem suum deserere noluit. Emmanuel Medina Olmos, Episcopus Guadicensis, natus die IX mensis Augusti anno MDCCCLXIX, parochus fuit et deinde rector Sacri Montis Granadae. Multum adlaboravit veluti concionator et catechista; Auxiliaris porro fuit Granadensis, et inde ab anno MCMXXVIII industrius Episcopus Guadicensis. In carceribus una cum Didaco Ventaja Milán detenus, cum eo vexationes, contumelias et ignominias participavit. Precantes et ignoscentes ambo pastores una cum aliis captivis manuballista, nocte inter XXIX et XXX diem mensis Augusti anno MCMXXXVI necati sunt, in loco quem «Barraco del Chisme» vocant, quemque terminant Felix et Vicar. Septem Fratres Scholarum Christianarum egregie apostolatum suum praestabant institutionis in urbe Almeria, cum in vincula ducti sunt. Ibidem quoque eximum testimonium christiana fortitudinis, caritatis erga omnes, amoris precationis dederunt. Nocte inter XXX et XXXI diem mensis Agusti anno MCMXXXVI interempti sunt: Frater Edmigius (saeculari nomine Isidorus Primo Rodríguez vocatus), in dioecesi Palentina natus, die IV mensis Aprilis anno MDCCCLXXXI; Frater Amalius (saeculari nomine Iustus Zariquegiu Mendoza vocatus), Pampilonensi in dioecesi natus, die VI mensis Augusti anno MDCCCLXXXVI; Frater Valerius Bernardus (saeculari nomine Marcianus Herrero Martínez vocatus), in dioecesi Burgensi natus, die XI mensis Iulii anno MCMIX. Vespera autem diei VIII mensis Septembris anno MCMXXXVI martyrium tulerunt: Frater Theodemarus Ioachimus (saeculari nomine Adrianus Saíz Saíz vocatus), in dioecesi Burgensi natus, die VIII mensis Septembris anno

MCMVII; Frater Evencius Richardus (saeculari nomine Eusebius Alonso Uyarra vocatus), in dioecesi Calaguritana natus, die V mensis Martii anno MCMVII. Nocte inter XII et XIII diem mensis Septembris anno MCMXXXVI interempti sunt: Frater Aurelius Maria (saeculari nomine Benvenutus Villalón Acebrón vocatus), natus in dioecesi Conchensi, die XXII mensis Martii anno MDCCCXC; Frater Iosephus Caecilius (saeculari nomine Bonifacius Rodríguez González vocatus), natus in dioecesi Burgensi, die XIV mensis Maii anno MDCCCLXXXV. Tum duo Episcopi, tum septem Fratres Scholarum Christianarum, continuo suam post heroicam mortem, veri fidei martyres habiti sunt. Eorum sacrificii fama increbruit et annorum decursu confirmata est. Idcirco Almeriensis Episcopus anno MCMLIV Canonizationis Causam incovavit. Inquisitionibus theologicis suetis felici cum exitu apud Congregationem de Causis Sanctorum absolutis, die XXI mensis Decembris anno MCMXCII super martyrio decretum iussimus promulgari. Statuimus ideo ut beatificationis ritus Romae die X mensis Octobris subsequentis anni celebraretur. Hodie igitur, in foro ante basilicam piaeclaram Sancti Petri Apostoli in Vaticano, inter sacra hanc diximus formulam: «Nos, vota Fratrum nostrorum Rosendi Alvarez Gastón, Episcopi Almeriensis, Angeli Cardinalis Suquía Goicoechea, Archiepiscopi Matritensis, Iosephi Antonii Infantes Florido, Episcopi Cordubensis, Iosephi Gottardi Cristelli, Archiepiscopi Montisvidei, et Oddonis Fusi-Pecci, Episcopi Senogalliensis, necnon plurimorum aliorum Fratrum in episcopatu multorumque christifidelium explentes, de Congregationis de Causis Sanctorum consulto, Auctoritate Nostra Apostolica facultatem facimus ut Venerabiles Servi Dei Didacus Ventaja Milán, Emmanuel Medina Olmos et septem Socii, Petrus Poveda Castroverde, Victoria Díez y Bustos de Molina, María Francisca Rubatto et Maria Crucifixa Satellico Beatorum nomine in posterum appellantur eorumque festum: Didaci Ventaja Milán et Emmanuelis Medina Olmos die tricesima mensis Augusti; septem Fratrum Scholarum Christianarum die decima sexta mensis Novembris; Petri Poveda Castroverde die vicesima octava mensis Iulii; Victoriae Díez y Bustos de Molina die duodecima mensis Augusti; Mariae Franciscae Rubatto die nona mensis Augusti et Mariae Crucifixae Satellico die octava mensis Novembris in locis et modis iure statutis quotannis celebrari possit. In nomine Patris et Filii et Spiritus Sancti». Quod autem his Litteris decrevimus nunc et in posterum tempus vim habere volumus, contrariis rebus quibusvis minime obstantibus. *Datum Romae, apud Sanctum Petrum, sub anulo Piscatoris, die X mensis Octobris, anno MCMXCIII, Pontificatus Nostri quinto decimo.* ANGELUS card. SODANO

*Secretarius Status © Copyright 1993 - Libreria Editrice Vaticana*

---

Copyright © Dicastero per la Comunicazione - Libreria Editrice Vaticana